

Naalackersuisup Erik Jensenip Inoqarfiit minnerusut pillugit ataatsimeersuarnissaq 30. - 31. maj 2017 ammarlugu oqalugiaataa

Nunaqarfinnut Isorliunerusunullu naalackersuisunngorlaatut qilanaareqaara ulluni tullerni marlunni inoqarfiit minnerusut ineriartortinnissaat pillugu ataatsimoorluta sammisaqarnissarput. Pingaarluinnarsimavoq ullut marluk ingerlanissaata pilersaarusiornerani qulequttanut immikkoortiterinissat aammali allanut inissaqartitsinissat. Innuttaasut pineqarmata ataatsimeersuarnerup qulequtaraa:

ALLORIARTA KIVITSEQATIGIILLUTALU.

Ataatsimeersuarnermi inoqarfinni minnerusuni ukiuni tullerni 4-ni kommuninut qinersinerup kingorna ineriartortitsinissaq tunngavissinniarneqassaaq.

Pingaartutut isigaara ataatsimeersuarnerup kingorna malinnaasussanik toqqaanissarput, ukiuni sisamanissaq atuuttussanik. Tassa allatut oqaatigalugu Naalackersuisoq allanngussagaluarpalluunniit suliat ingerlanerini nakkutiginnittussat.

Qularnanngilluinnarpoq pisuussutit ilisimasallu pingaarnarpaat inuit eqqaamiuusut pigisaraat. Sumiiffiup eqqaaniittut akisussaaqataasarnissaat qulakkeerneqartariaqarpoq. Kikkut tamarmik najukkami eqqaanut inuernerminnullu pingaarutilinnut peqataanissaannut periarfissillugillu peqataatinneqassapput.

Qilanaaraakka oqaaserisassasi, misilittakkasi saqqummiussassilu ullumi aqagulu tusarnaassallugit, sulininnut ilanngullugit toqqammavigiumaarakkit. Tunuarsimaannginnissarsi pingaaruteqaqaaq. Maaniippugut tusarnaariartorlusi, ilisimasasilu Namminersorlutik Oqartussani sulinitinni atorummallugit.

Naalackersuisunut pingaaruteqarsimavoq qulakkiissallugu nunarfinni aqutsisut nukittorsarneqarnissaat, aalajangaasinnaassusaat aningaasatigullu aqutsisinnaassusaat annertusarlugit. Inatsisissamut siunnersuut maannakkut tusarniaassutigineqarpoq, tassaallunilu naalackersuisooqatigiit isumaqatigiissutaata qulequtallip *Naligiinneq, Toqqjissisimaneq, Ineriartorneq* pivusunngortinnissaanut suliat ilaat. Siunnersuutip kingunerissavaa kommunalbestyrelsinut suliaannngortinneqassammat nunaqarfinni aqutsisut aningaasanik namminneq aqutassaannik annertussusiliisarnissaq, makkununga allanullu nunaqarfinni atorneqarsinnaasunik:

- 1) Kulturi qaammarsaanerlu
- 2) Timersorneq timigissarnerlu
- 3) Teknikkimut pilersugaanermullu tunngasut
- 4) Nunaqarfimmi inuussutissarsiornikkut suliniutit
- 5) Isumaginninnikkut inooqatigiinnikkullu suliniutit

Kommuninut, Nunaqarfinnut, Isorliunerusunut, Attaveqatigiinnermut Ineqarnermullu Naalackersuisutut kommunini sanaartornissamut pilersaarutit eqqarsaatigalugit suleqatigiinnissatsinnut ataqatigiissitsinissatsinnullu isumalluarpunga, taamaaliorlutami aatsaat

nunatsinni innuttaasut pisariaqartitaannut naapertuuttunik pitsaasunik sanaartorneq qulakkeersinnaagatsigu.

Sulissaagut. Suleqatigiilluarnitsigut inoqarfiit minnerusut siunissami ineriartortuarnissaat isumagissavarput inuutissarsiornerup inerisaavigineratigut, imminnut napatittunik namminersortut suliffiliortiternerisigut, takornariaqarnerup annertusarneratigut atugarissaarnerullu pitsaanerulersinneratigut.

Taamaalillungalu Naalakkersuisuni ilaasortaaqatigisannut Hans Enoksenimut Inuutissarsiornermut Naalakkersuisuusumut oqaaseqarnissaq tunniuppara. Qujanaq.